

# Tenor criteris e betg automaticamain

## Revisiun parziala da la lescha dal personal

■ (anr/fa) Il cussegl grond ha decis d'abolir l'augment automatic dals salaris dal personal chantunal per in pertschient. En avegnir vegn il parlament a decidir davart quel augment sin basa da differents criteris. La lescha da las collavuraturas e dals collavuraturs dal chantun Grischun vertenta è dapi Bumaun 2007 en vigur. In'analisa iniziada l'onn 2011 era vegnida a la conclusiun ch'igl existia basegn d'agir e da reveder la lescha dal personal. D'atun 2014 è la regenza vegnida incumbensada cun in'intervenziun parlamentara (*Beath Nay*, pps Cuira) da reveder parzialmain questa lescha «cun la finamira principala d'adattar la lescha a las pretensiuns dal dretg surordinà ch'èn sa midadas». La cumissiun dal cussegl grond per sanadad e fatgs socials (CSF) presidiada da *Christina Bucher-Brini* (ps, Cuira) ha predeliberà la missiva da la regenza tar la revisiun parziala davart la relaziun da lavur dal personal dal chantun Grischun. Mesemna ha il cussegl grond tractà questa revisiun da lescha.

### Per ch'il chantun restia in patrun da lavur attractiv

Per il parlament èsi stà incontestà d'entrar en la revisiun parziala da la lescha

dal personal e la tractar detagliadamain. Durant la debatta d'entrada han survegnì cussegliera governativa *Barbara Janom Steiner* e la regenza da differents deputads, tranter quels era *Beath Nay*, lauds per la missiva: Ins saja sa concentrà sin il necessari per ch'il chantun possia restar in patrun da lavur attractiv e ch'il dretg correspundia uschia al dretg surordinà, èsi vegnì ditg. Tant la regenza sco era la maiortad da la cumissiun eran da l'avis ch'ì saja d'abolir l'augment automatic da la summa da salaris per in pertschient. En avegnir duai vegnir decis davart augments individuals da salaris tenor ils criteris «situaziun finanziaria dal chantun, situaziun economica, cumpetitivitad dal chantun sin il martgà da lavur ed il svilup general dals salaris en las administraziuns publicas e l'economia privata». Ina minoritad da la CSF pretendeva però da laschar il mecanissem tenor il dretg vertent. Cun 93:21 vuschs ed ina abstenziun ha il parlament acceptà la proposta da la maiortad da la cumissiun e da la regenza. Tar la fin da redacziun era il cussegl grond anc londervi a tractar ils ulteriurs artigels da la revisiun parziala, sco p. ex. quel davart in congedi da paternitad.